

四庫全書

集部

欽定四庫全書

集部

梧溪集卷一

詳校官庶吉士臣何道沖

中書臣劉源溥覆勘

總校官進士臣繆琪

校對官待詔臣胡士震

謄錄監生臣胡澄

欽定四庫全書

集部五

梧溪集

別集類四元

提要

臣等謹案梧溪集七卷元王逢撰逢字原吉
自號席帽山人江陰人當至正間被薦不就
避地吳淞江築室上海之烏泥涇適張氏據
吳東南之士咸為之用逢獨高蹈遠引及洪
武初徵召甚迫又以老疾辭逢少學詩于陳

漢卿得虞集之傳才氣宏敞而不失謹嚴集中載宋元之際忠孝節義之事甚備每於詩首作小序以標其崖略足補史傳所未及蓋其微意所寓也是書傳本差稀王士禎屬其鄉人楊名時訪得明末江陰老儒周榮起手錄本乃盛傳于世榮起號硯農究心六書毛晉汲古閣刊板多其所校定云乾隆四十四年三月恭校上

總纂官臣紀昀臣陸錫熊臣孫士毅

總校官臣陸費墀

欽定四庫全書

梧溪集卷一

元 王逢 撰

孔子琴操四首

去魯作

汶泗交流兮龜蒙相繆兮鬱乎尼丘兮禮樂賜自周兮
大夫好修兮吾將返吾輶兮

過匡作

文王祖兮道在予兮天蓋常時則渝兮二三子毋徐徐
兮伊草露之濡兮

去衛作

我行於衛有淇湯湯彼或知本伊流則長載僵載徊禾
黍芒芒匪邶鄘子傷武公其亡

厄陳作

天地塞兮日月食兮君子厄兮周公云遠心不知所底
極兮

顏子琴操一首

居陋巷作

陋巷我居孰隘
湫兮薄田我田孰
嗇收兮我順我安
親同休兮仲尼聖
也道孰侔兮孰愈
予身從其遊兮

吳季子琴操一首

聘魯作

白日晚兮浮雲滋
馬吾秣兮車吾脂
望岐周兮不見念
泰伯兮在茲惟山
有龜兮惟水有沂
禮樂在魯兮高深

如斯聖不我棄兮吳具庶幾

衛女琴操一首

思歸作

有序

琴操曰衛有賢女邵王聞其賢請聘之未至而王薨
太子曰吾聞齊桓公得衛姬而霸今衛女賢欲留之
大夫曰不可若賢女必不我聽若聽必不賢不可取
也太子留之果不聽拘於深宮思歸不得援琴作歌
曲終縊而死古有絃無歌今絃亦絕矣因補一章

恭承母命兮奉先王暎姓後宮兮備酒漿中路王薨兮
妾或未亡遂太子之過兮何有三綱淇水沄沄兮苑乎
女桑目冷絃絕兮義也難忘

席帽山辭

席帽山兮峇亭山之人兮朝鉏暮經日月往來兮雲下
上俯萬物兮塵冥冥塵冥冥兮江介黑彼山人兮衣芡
白帶杜蘅兮咀松柏心周流兮影斯息出無節兮入無
時猿鳥胥樂兮樵牧我知學苟修兮行著槁死岩壑兮

予焉悲

寄所思二首

七澤連三湘衆水相沿洄青青江蘼草緣生洲渚隈蒼
梧下白日佳人獨徘徊容光與香艷幸好未衰摧采采
盈檐裳寄子楚王臺願表貞素節路紆難自來

處女難自媒才士難自薦自薦時尚可自媒令人賤猗
儺牽牛花弱蔓緣蒹葭光風拂衢路蘭自老幽遐豈無
上尊酒灑灑傾紫霞公庭大酺暇儻寄天之涯

龐公攜家圖引為張橘隱題

鴻鵠巢高林。鼃鼃穴深淵。所以龐德公。躬耕峴山田。當時劉表儕。雄材萬金足。置燕王臺臺。成禽荒甘。鴆毒醉。講臂錦呼鷹。來鷹飢受呼。飽則去。非熊之倫。孰得馭諸兒。豚犬遺以危。况復蒼生天下慮。蘇嶺石鹿雙聳然。霞日絢爛芝莖鮮。囊衣裹糒車連連。白驪青牝驂後先。舉家相攜入長烟。竟托採藥終天年。至今事跡有在心。無傳嗚呼孔明不遇大耳主。亦必老而隆中眠。

虞美人行贈邵倅

大王氣蓋世力拔山七十餘戰龍蛇間得人為霸失人
虜有妾如花無死所夜寒蒼蒼星月高不惜傾身帳中
舞大王恩深淺東海青血熒熒春草在當時早化劒雙
飛四面楚歌那慷慨芒碭山開五色雲雌雉竟與雄鸞
羣嗚呼後世亂紛紛非君擇臣臣亦當擇君

芒碭山山
字一作天

唐馬引

明皇樂極天寶年拏舟將求海上仙一朝神遊跨八極

數十萬騎屯雲烟赤文綠字不復見錦幪黃帕爭來獻
衆中一匹目如電膺門沫赭珠流汗龍顏眷愛不肯騎
蕭蕭弄影華清池奚官日給三品料教駢攻駒隨所之
是時羊車行幸早柳暗花柔忘却曉夢驚鼙鼓遂播遷
凝碧空涼遺宿草顛危注意大將賢有馬如此無人前
至今悲風起毫素濩略欲飲長城泉書生亦自心嗒然
危腦帽歌讀五代前蜀史有感作

白兜羅青衲襖金鴉翠翎七寶飾圓方反正無定式國

人戴之天下惜後宮如花醉妝美名王無心冠帶理大
木晝拔貪狼風猶汎樓船濟江水承平禮樂亦草草豈
但當時帽危腦可憐來者忘喪元紅纓未亂如雲擾君
不見玉帛萬國先王朝會弁如星麗九霄鳳凰麒麟在
郊輶夔龍前殿奏簫韶

天門引

天門高高俯四極寸田尺地登版籍澤梁無禁漁者多
瀚海橫戈恣充斥去年官饗私寇攘今年私醯官價償

屠燒縣邑誠細事大將不死鯨鯢鄉

謂博羅特穆爾左丞

烹羊椎

牛醉以酒腰纏白帶紅帕首定盟歃血許自新禦寇征
蠻復何有國家承平歲月久念汝紛紛迫餬口羽林堅
銳莫汝撓慎勿輕夸好身手春風柳黃開陣雲號令始
見真將軍

銀餅娘子辭

有引

娘子宋岳鄂王女聞王被收負銀餅投井死祠今在
浙西憲司之左逢感其節孝敬為之辭

蒼梧月落烏號霜寒泉幽凝金井牀綺疏光流大星白
夢驚萬里長城亡女郎報父收囹圄匍匐將身贖無所
官家聖明如漢主妾心愧死緹縈女并臨交衢下通海
海枯衢遷井不改銀餅同沈意有在萬歲千春露神采
魂今歸來風冷然思陵無樹容啼鵑先王墓木西湖邊
江浙平章薩木丹巴勒宅觀勅賜龍電劍引

有劍有劍龍電名白水為質金為精虹光夜貫斗牛氣
玉匣晝起波濤聲藏之九廟社稷重用之六合風塵清

英宗皇帝加撫惜八十一鱗寒動色灤陽冰泮臥蜿蜒
海子雨來翻霹靂神物自從前代寶國公親授彤庭錫
鵬鵜膏瑩今幾年淮汴襄漢興妖祲呂虔大刀霜雪鏑
頓芒挫鋒莫敢前公身佩之下幽燕獨當一面東南天
馬蹄所過春草歇百里青見孤炊烟古來克敵與制勝
未有如公忠勇盛主將無慚李貳師偏裨亦是花敬定
四郡九州聯貢篚千村萬落歸亡命劍當是時成大勲
凱旋却掛吳山雲歌長奔騰水石怪酒酣激烈貌虎羣

復欲叩閭斬佞臣以謝父老安生民於乎此劍實與國
公出處相類也不久踴躍變化延平津

任月山少監職貢圖引

好風東來快雨俱夫須亭觀職貢圖厥首高鼻深目胡
冠插翟尾服繡襦革帶鞶褱貂襜褕左女執盞右執壺
手容恭如下大夫酋妻髻椎將湛盧五采雜佩相縈紆
轉顧飛虎飛龍旗鏤耳者殿帕首驅瓔珞袒跣兩侏儒
一擎水難珊瑚株一戴玉琢狻猊鑪神髻髻鬋狀乳龜

復誰牽之鬢髮須最後裁弁飾寶珠若將入朝謹進趨
禿奚踉蹌亦在途錦膊驄帶汗血駒尊貴卑賤各爾殊
經營意直窮錙銖唐稱二閭道元吳今也少監稱京都
少監材抱豈畫史禹跡曾為帝親理河伯川后備任使
無支祈氏甘胥靡大德延祐貞觀比輦陸航海填筐篚
烏言夷面遠能邇少監臨古不無以趙公商公暨高李
頡頏霄漢嗟已矣霽雲曙開儼斧扆包茅不入頡誰訛
周編大書王會禮安得臣臣奉天紀陋儒作歌歌正始

淮南忠武王箭歌題垂虹橋亭

淮王昔下江南城萬竈兵擁雙霓旌錦裘繡帽白玉帶
金戈鐵馬紅鞞纓皂鵬羽箭三十六一一插向鯨魚腹
鹿麋晝號猿抱木王師所過全生育彤弓親授聖天子
弓影射入東吳水水波恍浸銅柱標仰見浮屠半霄起
王當是時戢武功指顧草樹生春風宋家降璽朝暮得
思罷貫草垂無窮浮屠上層龍所宮寶盤紺碧蓮花同
弦張滿月報騶發忽露半竒鄉雲中鏡歌啁轟鼓殆競

父老頓足驩聲應泗州使返睢陽亡漢關將入天山定
兩賢成敗關衰盛雄材逸氣王誰並我浮扁舟五湖興
載拜何由重安靖猛士經過合深省

僧蓮松檜圖歌書遂昌山人鄭明德序後

蓮公畫稱東吳精草蔓花房未嘗寫森張意象亭毒表
輒有神人助揮灑常州貌得劍井松劍氣曠暝相鬱葱
膏流節離禍幸免至今顏色青於銅孔廟之檜尤硤砢
地媪所守龍所窟藥柯落蔭根走石疑是忠臣舊埋骨

松兮檜兮豈偶然凌霜鏘雪兵燹年箭痕刀瘢盡皸裂

用命欲拄將崩天王姚

王安節姚嵩

憑城親被堅身殲城破

百代傳無人上請配張許日夜二物風雷纏鄭君鄭君
古君子此文此畫良有以我題短章非闔扉用弔忠魂
附遺史吁嗟烈士長已矣

敬題楊山居太史所藏文皇帝御書奎章閣碑本
後

先皇龍鳳姿談笑夷內難萬方賀清寧人文劃昭煥奎

章崇延閣天藻發宸翰字畫擬庖犧贊詠缺姬旦璇霄
麗日月華露濯河漢流腴蓬萊池垂輝鳩鵲觀今王廣
舊制碑本無點竄璽封賜臣瑞豈是世所玩為爾忠義
心可與金石貫蟲蛇探禹穴蟬蚋飛簡汗寶藏風塵外
永夜卿雲爛相逢感頭白展卷復長歎游儵懷故淵老
驥戀餘棧誰肯侍經筵流連忘筆諫

七里灘夜泊

山經富春來百里紫翠接嚴灘十八曲曲曲屏數疊兩

崖負金鰲一水流
冰碛直上石作臺
梯磴緣巖業雲霏
變朝夕天地齊
浩劫緬懷巢許徒
適一作此誠所愜
千秋釣游地不屬漢臣妾
客星在沔寥五緯光相協
澄潭龍偃臥影帶沙棠楫
風吹澗沚毛露灑松桂葉
先民不可見思從漢臯涉
夜久蜻蛉高長歌振疲茶

王貞白墓

在信州永豐縣

道出縣西門
躡履可百步
歸然翠石表
有唐校書墓
校書吾宗人
天馬謝弔御
首登上昇名
晚獲鄉曲譽
至今

坊改貫當時官復賦流傳折楊柳婉婉春態度載拜還
汎掃良非汾陽慕龍貴德自潛豹貴文不露邱園望京
洛豺犬方反顧竟抱孤臣憂白日空復暮樵童指梧櫟
往往冠蓋駐珠襦玉匣葬麥飯曾不具神飈薦林響公
意答知遇惟南豐山高靈溪浩東注

馬洲望孤山

海門窺長江鉅浸天浩淼山根纏坤軸百里見孤杪風
披陰霾晝露灑石黛曉龍來碧

一作蒼

林濕鷗舞白浪杳

居然蔽中洲隱若壓外微幽貞水仙態軒特國士表時
時降天人旌旆光縹緲予將展高步兵氣秋見兆嚴霜
草不殺悵望翠滑悄浮雲非無帶薄暮心裊裊

揚子舟中望鷺鼻山時聞黔南消息

山環芙蓉城私怪鷺鼻狀奔濤鎖長薄大石

山名

凜相抗

勢雄千軍壘氣馭萬鍾藏草樹春不蕃莓苔滑難傍剛
風過靈雨復值桃花漲破暝鷗鷺盤乘陰龍魚王飄鼓
一葦間攬之膽增壯謝安晉元臣豈跼江海量蒼生方

顛連其敢遂疎放黔陽百粵地黃霧吹虎鬚再觀神秀
姿不止西北向煒煒蒼精出閃閃白月漾三叫馮夷宮
吾奚獨惆悵

奉題高宗答刑部侍郎衛膚敏詔後為其七世

孫仁近賦

詔文附

勅衛膚敏省所奏辭免尚書刑部侍郎恩命事具悉
朕倉卒渡江圖籍散亡深慮吏緣為姦奏牘稽留平
讞失當以卿平日正色侃侃論議堅明據理守節屢

觸權貴必能為朕分別隱微章明枉直與其殺不辜寧失不經欽哉汝諧毋廢朕命所請宜不允故茲詔

示想宜知悉

七日

建炎龍渡江中外極觀仰赫焉志恢復寢爾濫刑賞公時命秋官固辭表三上夙忝絲綸日春班朝元仗乘輿今播遷宗社亦震盪空言忤權貴曷以錯諸枉放棄擲櫟材庶全雨露養皇覽賜手詔於昭日月朗大禹舍臯陶欽恤義誰廣巍巍白雲司濯濯金仙掌玄陰闕棘水

一旦風颯爽省疏甚詆佛無愧十八丈余山儼遺墓世
世敦禮享文光掩虹霞精氣懾夢魘卓落羣松冷姜蕤
叢蘭長經過率下馬謂有神還往我昨歌大招空谷答
靈響衣冠久徘徊氛氲方塊莽願公降生申吾得操几
杖

處女篇奉寄靳奉使

東州有處女門戶代清白七歲承母訓十歲遵內則及
笄秉機杼穀錦雲霧色蟋蟀秋梨陰想像龍鳳織雙星

望垂近河漢終阻隔不遺猗蘭佩香艷竊比德世無梁
伯鸞死化山下石日薄黃塵暮誰任補袞職凡百慎裁
量願售古刀尺三歎掩明妝遲君心鑒識

題烈女廟

有引

女何江陰人少有容操五季時避亂前湖舟中賊持
兵犯之何泣曰吾身墮汝手肯從吾禱之於天於父
母乎賊由是少懈何乃起立且拜且祈垂間竟投水
死後里父夢見何曰吾當血食此地伺湖成田則廟

貌祀我既而果然今廟在華藏寺南郡志所載略異
逢蓋得先大母所傳云

遺廟湖陰四百年斑斑江竹映嬋娟魚龍水落荏蒲外
雞犬村成壓柘邊不待清名垂女史尚存貞魄降神弦
君王社稷今焉在伏臘粢盛自儼然帷箔夜涼臨月榻
佩環晨響起雲輶湘靈鼓瑟虞風盛蔡琰聞笳漢鼎遷
嗟彼生還羞故國何如死節報皇天明妝靚服黃塵裏
重為傷時涕泗漣

錢塘春感六首

卷一

紫罽駟車從六龍盡隨仙曲度青空
蒼山樓闕旃林裏赤羽旌麾野廟中
百姓未忘周大賚成都元有漢遺風
流鶯不管傷春恨衝落桃花滿樹紅

王氣凌虛散曉霞虎闌麟閣靜烟花
中天日月迂黃道滄海風雲冷翠華
望帝神遊夢子國烏衣夢隔野人家
當時舉目山河異豈但紅顏泣塞茹

周南風俗漢衣冠五色雲中憶駐鑾
瓊瑤高藏白獸

蕊珠花發降文鸞
河通織女機
絲濕雨歇巫城翠黛寒
滿地吳山誰灑淚
一江春水獨凭闌

日華初動袞衣明
劍佩千官隱繡楹
五色黼函開玉座
九重湯藥下銀罍
書題鳳尾仙曹喜
恩浹螭坳學士榮
文化有餘戎事略
銅駝草露不勝情

瑤池青鳥集觚棱
白塔金鳧闕夜燈
雲母帳虛星采動
水晶宮冷露華凝
驪山草暗墟周業
郿塢花繁失漢陵
白馬素車江海上
依然潮汐撼西興

金爵觚棱月向低
泠泠清磬萬松西
五門曙色開龍尾
十日春寒健馬蹄
紅霧不收花氣合
綠波初漲柳條齊
遺民暗憶名都會
尚繞湖湄唱大堤

讀謝太皇詔藁

半壁星河兩鬢絲
月華長照素簾垂
衣冠在野收亡命
烽火連營倒義旗
天地晝昏憂社稷
江淮春漲泣孤嫠
十行哀詔無多字
落葉虛窓萬古思

讀德祐元年悔過詔藁

趙壁潛張赤幟旗東南民物苦流離白毛地冷陽春歇
天目山崩王氣移罪在股肱知太晚患成心腹悔何追
兩宮無復西湖路落日傷心草詔時

題宋進士謝安節故堂

有引

公為晉太傅二十九世孫諱國光字觀夫登宋進士
補太學上舍江南內附侍御史程鉅夫薦召不起以
隱德終於松江之立極所居安節堂翰林應奉宇文
子貞嘗為記至是孫晉徵題是詩晉字彥明善醫有

文行

安節堂開秋浦湄
芟芟束帛聘當時
星辰盡拱天樞象
鴻鵠終巢越樹枝
多士頌周成廟樂
兩生辭漢闕朝儀
雲霄一去高風在
手折芙蓉為所一作思

登飛龍亭

在集慶永壽宮文皇帝潛邸時嘗幸焉

冶城新築紫金臺
亭俯青松面面開
南國風雲龍鳳起
陰山霜雪鴈鴻來
秦王大業知無敵
泰伯高名動九垓
天意竟乖方寸願
遺民搔首重興哀

寄題張太玄天師素華臺二首

玉臺岌業上冰輪風露清虛隔幾塵珠樹鶴羣長繞夜
金莖仙掌靜融春斗牛星澹臨南極龍虎山高俯七閩
中外晏安祠事少一瓢明水獨朝真

星斗闌干露氣清神飈吹動佩環聲雲封玉兔長生藥
人在丹邱不夜城隱隱笙來王子晉迢迢夢隔許飛瓊
世間福地俱仙境何日從容散髮行

寄解公遠應奉

一作應舉

金匱要略卷一
桂樹團團不易攀吹香墮子月中間君家總在蟾蜍窟
朝士同趨虎豹關夜秉金蓮當閣道時承玉食自天顏
別來已覺升沈異休問牛歌未出山

簡毅夫同

知簡字下一
本有帖字

三月春雲拂殿低千官喜氣溢金闈策陳讜議龍顏悅
表謝殊恩虎拜齊南國幾年沾化雨朔州今日現文奎
故人身在江湖上不擬看花信馬蹄

讀國信大使郝公帛書

有序

霜落風高恣所如歸期回首是春初上林天子援弓
繳窮海累臣有帛書中統十五年九月一日放鴈獲
者勿殺國信大使郝經書于真州忠勇軍營新館書
蓋如此公字伯常仕世祖皇帝庚申歲使宋為賈似
道拘幽十有六年此書當在至元十一年是時南北
隔絕但知紀元為中統也先是公羈旅日有以鴈四
十餉公內一鴈體質稍異命畜之於後鴈見公輒張
翮引吭而鳴公感悟擇日率從者三十七人具香北

拜二人昇鴈跼其前手書尺帛親繫鴈足且致祝曰
累臣某敢煩鴈卿通信朝廷鴈其保重欲再拜鴈奮
身入雲而去未幾虞人獲之苑中以所繫帛書託近
侍以聞上惻然曰四十騎留江南曾無一人鴈比乎
遂進師南伐越二年宋亡書今藏諸秘監河南主客
劉澹齋云

西北皇華早東南白髮侵雪霜蘇武節江海魏牟心獨
夜占秦分清秋動越吟簾葭黃葉暮首宿紫雲深野曠

風鳴籟河橫月映參擇巢幽鳥遠催織候蟲臨衣攬重
裁褐貂餘舊賜金不知年號改那計使音沈國久虛皮
幣家應詠藁砧豚魚曾信及鴻鴈豈難任素帛辭新館
敦弓入上林虞人天與便奇事感來今

憶舊遊三首

醉酒高陽里題詩左氏莊碧雲垂草帶紅旭散花房流
水循除活飛絲拂鬢長座中誰潦倒遺却紫香囊

臺迴林光合峯孤岳影分勢從平地湧心與異人羣解

佩春相贈鳴榔夜忽聞時來面風渚瀟灑誦吾文
紫藟妨過馬青苔委佩魚名通天上籍腹有架間書春
水浮齋艦山雲落板車尚懷仁里好耕鑿對休居

過余剛中常清雲林二首

靈草綠含烟桃花紅滿川澹餐雲外粥清供石間泉雨
響注春酒風鳴彈夜絃經過恐難覓養鶴洞門前

一畝閒齋館三年守道心乍來驚野鹿久住識山禽亂

石浮春氣長松落晝陰世人知

一作如

有此翻畏白雲深

光相洞

光相何年有元和勅賜名金天靈鷲下黑雨石龍鳴莎
草迷行迹桃花隔櫂聲神遊到仙境童子恍吾迎

同周南野遊雨石山洞

地主周顥後邀遊

一作登

雨石山風岩寒六月雲岫闢重

關珠閣參差是芝田儻莽

一作曠

間洞天仙有籍君得上

清班

重遊光相洞

霜葉下楓楠蒼青石洞甜六丁非假鑿大禹若為探下
接炎州海幽生白日嵐人傳古尊宿曾此作禪龕

洞虛觀翫月

獨立鬢蕭騷天風吹綺袍石林秋後薄香殿月中高句
落丹山鳳神遊滄海黿仙人渺何所靈響度雲璈

靳士達憲幙遣從子惟正邀飲西湖二首

樓艦圍青幙宮壺絡錦絲忘形犀首飲留意鹿鳴詩十
里天開畫雙峯月上眉湧金饒夜色歌吹送行遲

湖山千古勝富貴一時心茉莉花浮酒芙蓉火炷沈
驄文停岸馬繡羽並沙禽再度雲回曲蕭蕭鶴滿林

題垂虹橋亭

長虹垂絕岸形勢壓東吳風雨三江合梯航百粵趨
對田連沮洳鮫室亂魚鳧私怪鷗夷子初心握霸圖

感宋遺事二首

有引

至元十三年正月巳延丞相入杭二月起宋三宮赴
上都五月見世祖皇帝尋命幼主為檢校大司徒封

瀛國公十二日內人安康朱夫人安定陳夫人二侍
兒失其姓浴罷肅襟閉門焚香於地並雉經死衣中
有清江紙書云不免辱國幸免辱身不辱父母免辱
六親藝祖受命立國以仁中興南渡踰三百春躬受
宋祿羞為北臣大難既至守於一貞焚香設誓代書
諸紳忠臣義士期以自新丙子五月吉日泣血書
五月無花草滿原天回南極夜當門龍香一篆魂同返
猶藉君王舊賜恩

天遣南姝死北燕
宋朝家法最堪傳
當時賜葬崇雙闕
混一當過億萬年

題馬遠小景二首

半天飛殿壓金鰲
一島春雲護小桃
爭捧夜香薰御榻
君王來聽月中濤

斑管書殘女史箴
水精深殿樂登臨
荷花大得薰風意
一夏吹香上玉琴

題趙文敏蘭

金史卷一百一十五
卷一
邯鄲夢覺策羸驂薊雪幽霜味飽諳手寫蕙蘭天上滿
歸來春草暗江南

題林和靖詩意圖

研池水合草堂深月在梅花鶴在陰一日盛傳詩句好

百年誰識紫芝心

和靖未嘗娶傳經業于猶子至
登第以其事如元魯山故云

題柯博士墨竹

奎章博士寫蒼筤葉葉中含雨露香華髮歸來無限思

九疑山遠暮雲長

題四皓圖二首

皓首龐眉四隱家
商顏山下遠秦蛇
未應羽翼高飛鵠
回愧東陵五色瓜

萬古乾坤一局棋
五文雲采九莖芝
高皇自墮張良計
肯下山來進諫辭

題南園菜亭下竹

此君同我出林丘
自有清風一種秋
不作長鞭及馬腹
却持貞節過人頭

鄉人丁祐妻沒不再娶號有髮僧予喜其有子為
贈絕句以發其微意

傳家有子日將車散髮從容候曉霞若也斷絃膠可續
後堂風雨暗啼花

題畫牛

南山春草碧油油夕陽在背餘光留僅容甯戚歌扣角
不受梁武金籠頭

題杉溪老人家壁六言四首

十角犁牛前巷一機黃絹比鄰婦事姑嫜婉順兒看賓
客情親

朝夕一盂白飯東西幾緡青鞋邀客烹葵別墅課兒題
竹高齋

紅白花明水寺青蒼樹遶沙村夜多涼月照席日有清
風掃門

掛巾藤蘿石上濯足芙蓉水頭落日不逢過馬東風忽
亂驚鷗

題李後主墨竹

斬斬金錯刀，稜稜鐵鉤鎖。寫盡江南春，曾不得蓬顆。

題趙子固蘭

月冷湘江佩風傳，鄭國香氣同堯。二女秀比謝諸郎。

題李息齋竹

雨露恩深沐風霜，節愈高本無斑。染淚秋思滿湘臯。

齋居

雲來長川白，雨歇高林青。正自捫膝坐，況有太玄經。

懷燕操

七國孰大兮金孰與多燕最小兮金臺薺薺地高天下
兮桑田海波昭王禮賢兮臺用不磨於乎有志憂世兮
它心謂何

西日操

日之遲兮四海蒼涼日既中兮萬景寵光中不我臨兮
西下不照我桑白虹上奸兮妖氛肆揚於乎授戈于天
兮人誰魯陽

望鄉操

春水兮滑柔春林兮蒨稠春莫不好兮我心則憂徘徊
顧瞻兮非先子所釣游於乎人生不歸兮孤死之羞

精衛辭

維山兮有石維水兮有枝朝銜暮銜兮填無已時形瘁
翮鍛兮口血淋漓海之大兮天倪海之浸兮天池海變
田兮天實我為身甚微渺兮心莫海窺於乎如精衛之
人兮誰其汝悲

涵泳齋辭

有引

雲間謝仲允架閣扁所居齋曰涵泳以延其師以教其子而屬予為之辭辭曰

聖教其淵兮聖化其天兮于躍于飛其魚鳶兮道不言而傳兮涵泳名齋為學然兮心游六經左右逢原兮時雨春風尚詠歎乎斯弦兮

題俞氏錦野亭詩意圖

有序

錦野亭詩者宋吏部侍郎臨安俞公烈若晦傷在昔

錢氏為國斂重民困而作也公登淳熙初第累遷中書舍人會宗室希閭由官所奔喪歸誤伐韓侂冑祖壠傍竹為造墓具法司承侂冑意旨援持仗竊盜例公曰墟墓非人室比兼未嘗持仗今追兩資送它州安置罪涉太重夫有官之家猶得贖例矧希閭在屬籍特不得贖乎遂獨以聞止罪伐竹者侂冑痛銜之尋嗾言事者論去家食凡五年起知贛明鎮江三郡時饑疫並興活淮民流移者不可勝計又捐已田倡

義後鄉人多德之後召為吏部卒廩蓋其裔也廩築
室松江之青龍存志畎畝曰不忘先澤因取詩意繪
圖屬予序而歌之用啓孝子順孫之永慕也

孰有血氣兮不知所天孰知禮義兮而忘其先錢社既
屋兮錦野草莽俞有詩存兮風系吳土萬支一本兮何
間今古顧瞻畎畝兮匪稌伊黍黍稌播兮畎鍾日鼓腹
兮歌雍雍謂燕雀兮毋遠爾鷃子若孫兮肯構

張叔夜衣冠墓

高林度疎風僧迎黃葉行興言張叔夜遂謁衣冠瑩白
河幾橫流寶氣餘崢嶸傍開洞若堂周抱山如城無時
旌榮下中夜珂佩鳴得非忠義魄遙過謝先生疊先生
死固晚並有夷齊清越禽巢相依歲歲樂生成微物知
所止見護虞與衡我來屬盛世浩思秋雲平留夷採衆
草穰露亦以盈未知百載下誰復踐其形

題墨禾

先王厚稼穡訓言載書詩後賢懼荒怠圖以鑒來茲鳴

呼人文弊遂有丹青師甚至被龍袞殿上染花枝纖穠
極天真何益家國為相氏一作柏氏代北胄乃背世俗馳手
寫一穠稻自比九莖芝汜汜瀼露溥裊裊秋雲垂所願
天下民與帝躬耘耔殊鄉布穀歌梯稗搖風漪梯稗熟
尚可蠹賊害方滋作歌歌道周庶幾良牧知

宿淞江館

雲腳霾日車石角鬪潮音朔風回薄暮故故吹我襟
我始適大邦思快父母心置酒商女館送目浙江潯歌

鐘殷廣陌樓閣帶遙岑
颿輻聯疊疊駟牡駸駸
明王都在昔上相鎮斯
今本將元方車豈為莊
舄吟梅花耿玉雪坐久
香滿林終宵樂清夢不
記歲華陰

草萍值雪

蔣蓮雲四合草萍雪紛
雨颿颿山寒勁慘慘野
色暮茅茨道傍舍槎枿
溪口樹猿猱憑深林僕
馬疲中路雙親各垂老
顧我仍百慮天嗇孝養
歡徒攜甘旨具薪蒸燎
衣褐筐筥陳薯蕷窮冬
且加餐無為迫前驚

玉山道中

羣山奠南服秀色競東迤我迎懷玉來一雪淨百里冰
溪馳晝夜湍激石齒齒風林迴蒼寒雲日開繡綺役夫
前呼并繚繞入峻崦時無盜賊虞地有形勝美沽帘矗
深崦燈鼓動虛市時時斑白民出售糴與麋乾封古名
鎮烟火望中是何得一囊錢親筵致甘醴

自乾封歸省祖壠過大南嶺向玉山

從親客殊鄉所忻塵事屏茲乘有方役願言千里騁朝

辭縣北山午踰虛南嶺濕嵐返浮陰高日下疎耿亂田
麥蕃撫絕壁松秀整登登使輿勞委委蘿徑永異跡辨
夔足獨往見僧影沖襟暢寬曠玄趣集深靜邱墓躬汎
掃庭闡念定省僕夫戒期程烏啼復予警

感託上任中丞秦治書四首

西北雄都城嵒嵒蒼龍闕御溝紆河漢端闡夾日月穹
窿複道上劍佩嚴森立聲教被不毛琛贄來窮髮始駝
白馬經載降瑤池節華音流傑休庭舞散渾脫陛下鼎

盛年行矣纂謨烈

西日下五城歸騎飛輕蓋美人遊蘭苑公子車同載
噦噦八鸞音喬喬雙珠佩華星爛複閣翠島涵清瀨
鳴絃文魚泳飛觴王睢邁佳期樂焉極芳年諒難再
誰其守寒閨寤寐衣裳會

長安多列侯甲第青雲衢熊羆布畫戟鼎鼐承銅鋪
恩分玉液酒勅賜虎文駒香塵霏步障光風轉流蘇
朝除大黃門夕拜執金吾器盈靡善持車敗良疾驅
鐘鼎宜

享德貴寵祇禍愚由來明哲士兢惕保身圖

車鳴何彭彭馬馳亦啾啾輕裾從長蓋相適江南州江
南信樂土璇題麗飛樓王餘吳下膾春雪郢中謳故里
難重懷震駭決河流桑棗歲漸新風俗日復媮華夏何
由實杞臣一作民徒煩憂

靈岩涵空閣望太湖懷隱士

具區古震澤壯麗東南州長風地軸動初旭鼉采浮白
榆根株懸夜久光相繆三江混一氣四湖匯支流橫從

鳬鴈沙晦昧蛟龍湫蔥青匝水樹丹碧涵岑樓盤盤洞
庭山橘如杭稔稠餘甘釀旨酒亦博千戶侯詎無英豪
士產茲山澤陬手披金薤文身被翠羽裘蒼生不當問
於焉以遨遊遨遊道有在誰將候虛舟

分題得劍池送張吳縣之嘉定同知

東吳古澤國虎丘萃磅礴泰媪閔神秀巨靈為開鑿
薛立蒼翠飭呀露斷鵲兩崖日色寒一道天光落闔閭
葬其下風雨夜移壑至今斗牛間紫氣常炳若我嘗俯

瞰之或恐蛟龍躍令尹儒家子物理素精博五年飲此
水遂蘇吳民瘼遷官槎江上百鷺見一鶚宿暝塞汶濟
秋容淨伊洛行須頌河清休聲著延閣

復如乾封晚經漁浦

窮曠經漁浦寒水白於練總總星東出獵獵風北轉眼
中獸蹄過笛裏魚狀變稍聞刁斗應漸喜烟火見誰家
長林根繫艇沙渚面天含瀟湘思山錯吳越甸承平謝
憂患少壯忘羈賤瓜橋往未遑雲源訪殊便明涉子陵

灘桂酒同一奠

韓醴泉先輩余麴車道士邀遊東歡橋釣磯岩壁
既赴鄭漕臺宴衆謂予有高世志屬賦進酒歌遂
走筆

我志千載前而生千載後間勞濟勝具或寓醉鄉酒東
郊秀壁叅錯明蟬蛩下飲波神驚看雲衣上落照赤放
櫂却赴漕臺盟漕臺筵開曼秦筑霜寒入簾吹絳燭沈
香剗槽壓蔗露風過細浪生紋縠水精盃蒼玉船載酬

載酢陶自然鼻頭火出逐麀未必樂髀裏肉消騎馬良

可憐五侯七貴莫糞土蜀魏越

蜀越一作蜀魏

仇如飄烟聞雞

懶舞飯牛恥中清中濁方聖賢豈不聞縣譙更闌漏遲

滴又不見天漢星疎月孤白幾家門鎖友

一作瓦

松青僅

留校書墳上石墳上石終若何醴泉麴車更進雙叵羅

寄程嶺程撫謙

憶君城南同筆研別來十載不相見好風吹我千里行
又得游從永豐縣永豐縣前山崇牙永豐溪頭水齧沙

栗留亂叫格磔語庭雪落盡櫻桃花邇

一作遠

知肥遯雲

深裏猩聞酒香屐折齒青草陂塘魚噉喙黃泥茱舍蠶

眠起尊翁

其父名頌

頌白棄手板弟郎羈貫親文史滄浪或

接莞爾笑空谷只待楚然喜我亦長歌求友章時

一作昨

復夢對月滿牀明河垂地斗轉曙蔣家尖刺青微茫三

棲岩六峯石釋楊仙陳此其它洞歌幼眇天唄殷水蜜

甘馨土瓜白安得胎禽各一隻上下烟霞縱心迹却過

程嶺論程易

篤敬夫御史夜過蘿月山房

我僑縣北西岩阿石上天矯皆藤蘿緣牆蔓屋帶松桂
夜有霽月相娉娉蒼苔露濕籟逾靜顛倒空明天地影
天孫橋渡鵲休飛水客壺傾鶴初醒此時嫦娥朝廣闕
太乙仙遊杖烟熱漆書竹簡動蚪蚪布襪青鞋冷霜雪
御史鄰居偶扣扉攀蘿弄月樂忘歸蘿與月兩無違願
月慎敵太陽體願蘿常緝幽人衣山靈指示邑可改稅
駕息馬惟子待

陪曲達魯噶齊主簿遊平門山還飲鄭氏水閣

階前神駿驕逸羣席上賓客多能文
千瓢酒瀉椰子露一岸紅浸桃花雲
行庖香狸面如玉簞簞烏兔一作眼
瞳綠鈎簾不下山四寒絳紗歷亂風
林燭

三岩行宋邑人蔣夔僧楊氏咸隱此

皎皎停白駒翩翩上雙鳬
槁項黃馘相候呼草木為我
咸敷腴峽然黝色壁厓起
王孫罷吟鶴來跂徑紆石角
斜斷鋒溪染花香淨流泚
混沌之竅三層開呀若疊浪

龍門來得非地設仙境界無乃天造真樓臺雲關岫幌
謝斧迹露下嵐生翠成滴我方翫髣對奇賞僧何因緣
此長寂西偏尋丈基階荒讀書嘗隱蔣賢良松根久冷
青燐火觚稜還飛金鳳凰世上繁華易塵土可歎山間
亦非古樵兒安知時代序爭和牛歌出林莽

僧慧畹畝同芳圖引

慧沈姓嘉定儒家子今名復字復之隱居教授鄉里

君山秀蔚大江白慧書記者山椒宅愛吟楚詞畫楚蘭
宿世應為獨醒客靈均獨醒那復見見蘭猶見靈均面

邇來蘭亦少見之騷人志士良心眷一春天氣今日美
思攬山雲擢江水席帽飄蕭蒼隼林松腴爛漫冰蠶紙
澧花沅蕊澹不嬌光風入簾佩影搖婉乎凌波之微步
隱然拔俗之清標孤竹孑孑節自持似與玉樹賓朝暉
女蘿婦寺態倒舞厓石青裳衣却憶驂鸞夢遠馳洞庭
瀾茫吞九疑蒺藜平接賈傅井鷗鵠叫斷湘妃祠湘妃
祠賈傅井跼招魂兮魂莫省先民不作兮淳風曷回水
魅前跳兮山鬼後騁慧也釋氏英意匠擱染趙弟兄子

願除結習我願離夢想方駕太史窺荆衡桂酒奠芳烈
琴絲發商聲以寫我曠世感慕之中情

奉寄王丁二御史

春風浩蕩東南來弔古訪舊金陵臺龍蟠鍾山石虎踞
二十四豸臨三台其中弼彪兩柱史飯疏日飲青溪水
女牛翼軫避法星文章禮樂羅賢士玉宸帝居霽雲鄉
一塵不動間琳琅煮茶數對冶亭晚黃雪滿地松花香
君不見六朝前後三百霜當時王氣迴天章瓦棺閣廢

辱井在王謝宅燕他家翔又不見自唐逮宋為政好顏
張二呂程公顥勞勞故址蟪蛄鳴幾多人迹埋烟草榮
華如夢足驚心惟有清名世共欽願言白馬之生且復
諫庶使丹雞之盟良可尋

前六峯行貽葉舜可

有引

信州永豐縣東下五十里地名柘川有峯六筆圭屏
蟾鼈抱兒是也陳真人祠龍井並在靈雨岩下陳五
代末得道者甲申春二月予同道士余常清訪其地

主葉舜可為茲峯遊適大雷雨因賦是詩舜可負材
德弗仕咸稱之為長者云

客樓拂曙嵐光入起見千山萬山集紫騮小縱春風韁
六峯秀拔當前立六峯僻處始我遭升翻霹靂龍為逃
斯須靈雨過絕巘呈態獻狀爭雄高老蟾膨脝飛不得
巨鼇憑陵氣相食屏開琉璃圭拱壁抱兒嬌媚愁無色
惟餘孤鈿之筆勢卓然倒影畫破清泠泉王珣江淹夢
已遠紫翠長掃烟雲天天低石林籟自響搥具拄頤神

獨往泥蕨叢生虎迹間
岩花却墮鷹巢上
乍來毛骨恍
塵蛻久憩衣巾颯秋爽
日靜時飄大梵音
月明忽降瑤
臺仗武夷九曲仙
所都江郎參倚尤魁梧
南東相望德
不孤足配岳牧
臨方隅子何尚友
山澤癯涵泳聖真咀
道腴許我畫入幽居圖

寄王率初

野人性僻貪出遊
不知我者云何求
仙風道骨本來有
詩債未了今生酬
去年匹馬當春色
作賦天山動山碧

君家銀餅五尺高日西橫臥青苔石高齋三宿人事紛
掉頭又入三峯雲棠梨花開叫杜宇思歸便發長江舫
彌旬路近芙蓉城却望乾封涕如雨乾封親老拘微官
芙蓉城外松楸寒艱難臥病傍鄉戚去住兩意含辛酸
辛酸有時已去住何由已笛樓雁過林滿霜織戶蛩嘶
月涵水衣裝蕭蕭餘藥餌放懷且眺東南美泰伯祠高
閶闔門堯天宅化弦歌里承平況是官府好甲第垂槐
拂除道相逢英采識周郎任擲金錢喚蘇小蘇小裙拖

湘漢烟蜚襪垂髻珠翠鈿斂蛾含貝立在前檀槽玉軸
鳴鷗絃聲腸斷暫停手君佐新歡命行酒野人曠誕
禮法疎自起鳴鳴衆擊缶如泥之醉不省知就睡夢繞
豐溪泥鯉魚竹笋彷彿見愴怳重與君攜離攜離二三
月君尚留西浙歲晏問君回頓解憂思結今年天山我
再來海棠暖照吹笙臺巫峯一半落杖屨地有六峯竟為十
日終徘徊終徘徊太潦倒世上悠悠似君少高盟端可
同死生細故那能掛懷抱會當通家復通譜更共拜親

仍拜嫂自此襟期霄漢間尺書長寄南飛鳥

敬題諭淮安朱安撫詔後

詔文附

大元

一本上有上天眷命四字

皇帝聖旨諭淮安州安撫朱煥據

陳楚客奏臣與朱安撫同年又有通家之好自戊午
歸順之後不相見者十有八載今王師弔伐諸道並
進數內一路領連河清河將士攻取淮東未附州郡
竊恐城陷之日玉石俱焚臣於故人情分不容緘默
且彼所以嬰城自守者無它原其本心但未知趨向

之方初無執迷抗拒之意今大江南北西至全蜀悉
入版圖若蒙聖慈特發使命宣示德音開其生路彼
亦識時達變之士也寧不以數萬生靈為念乎臣昧
死上言伏候勅旨准奏今遣使持旨前去宣布大信
若能識時達變可保富貴應在城守禦將帥同謀歸
順者意不殊此故茲詔示想宜知悉至元十二年七

月

漢兒
字書

九鼎沸莫止大厦傾莫支太陰初陽不得燭下土小龍

望望閩之陞六宮掩泣向北去孤臣憑城尚南顧也知
天命有所歸忍為生靈貸生路當時不死良為此至今
人說姜與李君家富貴八十年露臺風館啼猩鬼世事
茫茫難具論遺詔幸得傳諸孫烏絲細字書題罷黃葉
乘秋正打門

題張彥升省掾所藏代馬圖

綠睛鬢髮黃鬚兒翠裘錦帽當軒墀紫絲遊韁玉花馬
意氣八極同驅馳浮雲滿身雪滿足阿母瑤池向曾浴

霜風蕭蕭八尺影在野猶自空天育吾聞真龍非豢牧
一食或盡一石粟天寒日暮長楸間鈍質駕材當頽伏
為君三歎三祝之慎勿輕受黃金羈

聽鄭廷美彈琴

畫欄月照芙蓉霜博山水暖薔薇香石屏石几青黛光
鄭鄉君子琴中堂榴裙蕙帶辭羅洞玉佩珠璫脫飛鞵
何處春深雲滿林小巢並語梧花鳳君不見湘靈鼓瑟
湘江澣苦竹祠荒愁暮雨遺音一聽增感傷使我無言

重懷古重懷古雞喔喔明星爛漫東城角誰家尚奏桑
間樂

婦董行

有前後引

婦董滕人劉進妻也進與兄順並以勇稱金季山東
亂盜蜂起因共募丁壯保里閭天兵駐嶧山進單騎
覘之中流矢死順徙家淮南舉室溺淮水董為宋招
撫呂文德裨將所獲欲犯之度不免乃謂曰夫喪不
遠家難存臻一身流離晚在旦暮死生非我有願將

軍勿疑夜果生一男先是順已入濟州愬于石太尉
珪曰順有弟不幸没于敵其妻在孕為南軍拘幽舟
中萬一不得收遺息使弟為厲實順之罪也惟明公
是圖石為發步卒三百人跡其所往次淮揚始知董
所在陰使人偵之生子蓋三日矣及見具道順意董
悲感不自勝且收淚一作收涕曰妾以姪不得先夫死今
幸不辱先所天使有後皆伯賜敢名此子曰伯祐以
志不忘遂抱授偵者目送數十步投江以死至正五

年秋進立孫士行語其事於逢逢高其節義作詩哀之

北軍南軍和議時兩壘對立龍鸞旗羣雄棋峙國瓦解
乃與婦董光門楣星辰錯亂風雲氣乾坤造就冰雪姿
渾家性命葬魚腹一舸涕淚隨鵑夷長眠自足為義鬼
後死只望余孤兒兒在腹中兵在目憶夫心頭臂消肉
日晝慘慘陰靈歸夜黑冥冥波浪觸馬駝磧遠暗塵土
雞犬村空疎樹木嶧山誰收白玉骨蔡州地陷黃金屋

太尉前歸明主化招撫姑存寡妻宿羞看人面問消息
強通語笑寬羈束伯順見義勇著鞭銳士協力鋒爭先
道傍弩伏荆棘底掌上珠還江海邊將門有後傳世世
墓祭無所從年年湘妃摻袂一作法遡寥廓漢女結珮窮
幽玄縞衣綦巾共縹緲文魚赤鯁長周旋肩亡未久齒
亦喪獨聞其風猶凜然中原山河想如故目斷幾點滕
州烟

逢為是詩已士行復述順一事尤卓卓順既得伯祐

以行時董死事覺招撫發步卒亟追之賴左右弓弩
手散去還白太尉甚義之處之麾下凡兩致太尉命
往覲太祖皇帝于魚兒泊之行營賜金幣鞍馬且命
撫循邢磁贊黃十餘城用寧謐上功受黃金符官昭
勇大將軍行右副元帥濟兗單州等處管民長官在
官十餘年士民翕服晚有子五人未老棄官以伯祐
襲其爵為奉訓大夫濟州管民長官是年至元元年
也故錄於詩後併以俟執史筆者采焉

後六峯行

一名六石

去年六石遊礮車雲合龍起湫滂然雨過景新沐爽氣
欲與胸次侔今年遊六石燕子風輕好春色坡陀下馬
入崦坳怪木長蘿始捫歷巫峯失却青半壁方蓬倍列
神仙域泰階南斗遙相望夜夜分光委空碧高寒積陰
自太古此日羣巒霽亭午桃花千樹鷓鴣鳴柏葉深林
麝香舞五季陳道者道成竟霞舉閒騎蘇耽鶴或跨茅
君虎祠前溪流窅窕通蒲牙短刺沙抹紅聲聞天樂寬

無處雞犬尚隔烟蔥龍岩呀谷露轉清絕女絲男新總
忻悅山中樂土無代謝世上朱門有傾奪我時縱觀心
神舒授簡忝後諸大儒興發不顧三足蝮尺箠願策金
鼈魚東踰扶桑南蒼梧回轡北謁承明廬圭以面龍袞
筆以草諫書屏以坐至尊下令黎民同晏如獨憐抱兒
之小姑身死猶望邊征夫乾坤終窮亦不免萬物變化
無時無撫掌自笑愚公愚

高景山

一本山下蟠松歌

有中字

朝廷無遺材而我觀蟠松松高僅尋丈足當高景山奇

雄外惟英華發內實神秀鍾氣食白額虎勢挾蒼睛

一作

精龍鱗張鬣奮角爪露兔絲纒絡苔花封支離偃蹇盤

礴倨驚百千狀葉擁車蓋萬箇青童童東柯西幹尤不

同隱若雲鵬離溟渤六翮始舉扶搖風幾欲徑上天摧

碎霹靂鋒夔魑獠狂莫敢近上帝素有生全功貞姿森

森凜鐵石靈響殷殷來笙鐘流膏伏晶化苓珀屢起凋

瘵蘇疲癯胡乃甘自屈跡吳沼中我持美酒玻璃紅三

酌載拜十八公今之拳拳突梯世不容公其正身直節
以答上帝衷三辰復朗曜四海無困窮野夫獻頌蓬萊
宮

奉寄劉廷幹都漕

名貞終南臺侍御史

東南蕃殖數吳疆太府均輸百萬糧夜對紫微星直上
曉經黑海路彌長商蠻載肉蘄神嘏父老傾都望米檣
黃帕越羅天水色玉餅官酒鬱金香殊恩厚錫當霄漢
盛德高名著廟堂劉晏從容邦國富蕭何談笑甲兵強

士林爭售來禽帖故郡猶歌召伯棠花底佩行清染露
柏邊旄節迴含霜每憂野逸為牛後思正朝儀接鷺行
他日與聞當世事山林朝市孰相忘

奉送董孟起水軍赴樞密判官

名搏霄

駟使傳宣下紫冥陽侯隨節渡滄溟雕題外服思文化
白髮中原望將星秋入羽林兵衛肅夜經龍島劍花腥
久懷令聞如楊素今喜威名過衛青猛士固應煩練習
時奉旨練遺黎終得慰飄零依稀桑棗空原野蒼莽茅
習軍馬

簞接塞庭此日朝廷深倚注百年河嶽載清寧陋儒材
力慙無補惟待燕然續漢銘

題家太學鄭上舍墨蘭

有序

公諱思肖字所南肖與南何居義不忘趙北面他姓
也世家三山曾大父咸仕家父起淳祐道學君子公
太學上舍應博學宏辭科會元兵南叩闕上宋太皇
幼主疏不報國初諸父老猶能記誦之語切直犯時
禁俗以是爭目公公遂變今名隱吳下所居蕭然坐

必南向遇歲時伏臘輒野哭南向拜而返人莫測識
焉有田三十畝邑宰素聞其精墨蘭不妄與人因給
以賦役取之公怒曰頭可得蘭不可得宰竒而釋之
又嗜詩題蘭云玉佩清風挽不回暮雲長合楚王臺
青春好在幽花裏招得香從筆研來過齊子芳書塾
云天垂古色照柴門昔日傳家事具存此世但除君
父外不曾別受一人恩寒菊云寧可枝頭抱香死何
曾吹落北風中禦寒不藉水為命去國自同金鑄心

其為文操行率類此晚年益究天人性命之學竟以
壽終

舊傳獨行老康成文物衣冠魯兩生甘與秦民同

一作潛

避世恥為殷士裸如京天池水淺鯢南息衡岳峯高雁
北征三百運終遺墨在秋風九畹不勝情

王公詩蓋賦於元時已作避秦恥殷
語若見所南心史當更有深服處

題信州總管耶律興誦卷

此首原本在
送賈靜安後

蒼翠千峯拱上游地同吳楚控南州
繭絲歲貢親王賦

風俗今移列郡侯春日歌鐘停舞燕晨星鼓角動鳴騶
四民共話深仁澤桑柘連雲麥蔽邱

簡盧起先御史

名嗣宗疎齋之後

御史承恩出帝廬弓裘文采照圖書雲烟飛動龍香劑
風日雍容豹尾車青草瘴消炎海外碧桃春透故園初
懸知袖有征蠻策不學盧鴻遂隱居

送賈靜安員外之行都水丞

水部中朝世胄家兩曾畫省對薇花九關好附升天翼

萬里初乘貫月槎
龍返故宮遺蜺蟒
民移高阜失桑麻
宣防何似河清頌
早播皇風被邇遐

登信州溪山第一亭

亭扁晦庵先生書

第一溪山屬考亭
周遭樛木自林垌
中流半夜飛星白
絕壁高寒過雨青
上界異香雙鳳下
仙家橫玉小龍聽
登臨偶憶徐元杰
為摘梅花薦典靈

寄理幕蔡君美兼簡東流陳尹

羣山龍鳳仰重暉
一水芙蓉近紫薇
南渡流風文墨盛

北來王化簡書稀
黃鬚白馬凌晨出
烏榜紅舷犯月歸
思得東流陳令尹
裹茶相與看烟霏

喜朱子才知事迎太夫人至二首

白馬青袍幕下賓
樓船迎養太夫人
關山迢遞孤雲暮
雨露涵濡寸草春
屏障久虛金孔雀
兒孫俱長玉麒麟
知君順色非難事
心待平反答至親

畫舫青簾駐日斜
綵衣白髮照江沙
風塵忽見老萊子
庭院正開護草花
鸞錦載頒新誥命
魚軒穩稱小香車

珍腴調罷親弦頌盛事由來出故家

題汪叔志賢母傳後

母陵陽陳氏寧國郡尉孫和父妻也

阿嬈强健髮如新重閣脩簾坐錦茵
萱草雪霜深待臘桃花風雨暗移春
兒成近續潘郎賦女大還依孟氏鄰
輿誦總歸慈訓力史褒貞節更無倫

貢泰甫待制降香南閩中途有司業之命北還奉

贈

千里閩江宿瘴開，九重天使降香來。
風雲篋笥芝蘭氣，星斗文章館閣才。
金節本隨神馭下，綵船仍被聖恩回。
諸生顙望陽司業，化雨行分到草萊。

寄楊鐵厓司令

先生就隱東南地，罷賦甘泉奏漢皇。
春雨正來龍尾道，長鑣猶斷禹餘糧。
天孫無奈宗元拙，力士安知太白狂。
清夜一星江漢裏，幾人云是少微光。

寄堵無傲宣使

雲開斗北鳳鸞飛
天入江南駟騎肥
星月五更丞相府
風烟萬里使臣衣
薇花露冷香渾濕
柿葉秋深樹半稀
新比鄭虔詩畫好
草堂野趣莫辭揮

寄邊伯京帥史

六朝故地起秋烟
並馬清遊記昔年
消息近傳閩海上
襟期猶在斗牛邊
元臣外閫旌旗合
從事多才贊畫賢
二月榕陰叫鸚鵡
題詩魚寄百蠻箋

邵伯岡縣尉有一奇石子

一作予

名為藥珠峯為題

一作
復題是詩

君家石笋光於雪秀與昆侖一氣鍾
雲液暖蒸珠蓓蕾
月波涼浸玉芙蓉根移瀚海三千劫
影入天門第九重
不待奇章識神品研池春水化游龍

聞武岡消息

萬里南荒瘴未消
枕椰椰葉嘯鴟梟
石頭飲羽終疑虎
蛋一作
蟄種稱臣尚姓猫
金鑄甲衣懸醜地
黃封乳酒下

青霄三軍再一作
戴荷天王德擬奏
鐃歌協舜韶

題明妃圖書鄉先達陸子方詩後

詩附

忍辭漢月戴胡天鴈帶邊聲落馬前地出黑河非故國
草生青塚自常年朔風寒雪凋雙鬢舊思新愁寫四絃

聞道至今魂不返夜深直上氣蒼然

青塚在黑河傍夜四更氣蒼然直上

江陰萬戶完
仁山為余言

當時隨例與黃金不遣君王有悔心近使來傳延壽
死回思終是漢恩深妍醜何須問畫工美人終日侍
宮中奉春初計真堪恨欲望單于敬外翁青塚千年

恨不埋琵琶馬上幾時回
宇文高氏爭雄日突厥柔
然獻女來已恨丹青誤妾身
何煩更與妾傳神那知
塞北風霜貌不似昭陽殿裏人
鬢雪中郎妾不如脫
身無計漫相於勸君莫射南飛雁
欲寄思鄉萬里書

寄陳東流

幅巾蕭散外形骸
春日花明畫舫齋
從事屢陪山簡馬
休居新饌庾郎鮭
中天列宿依宸極
萬國豐年仰泰階
來歲東流喧父老
故應文采動江淮

奉簡黃大癡尊師

十年淞上籍

一作築

仙關猿鶴如童守大還故舊盡騎箕

尾去漁樵長共水雲閒吹笙夜半桃花碧倚杖春深竹
笋斑顧我丹臺名有在幾時來隱陸機山

簡班恕齋提學

一官湖上似閒居酒滿匏尊架滿書庭草春深眠叱撥
研池月上影蟾蜍猶聞桂樹歌招隱未可丹厓賦遂初
漢主久思班氏學定虛天祿召安車

同李用中掾郎訪魯至道總管值遊西山口號書
石屏上

一雙峯插湖西閣五尺童磨柳下門日上雲霄忘倚馬
風清泉洞樂呼猿落花漫漫迷行跡白髮依依抱酒尊
多却腰間玄玉佩不無驚犬吠前村

簡劉仲斌總管

角巾歸第內湖邊無事頻開避暑筵荷葉露香侵寶鴨
薇花月色爛觥船風流醞藉過全晉慷慨悲歌陷舊燕

天子遙應念遺老賜來靈壽伴高年

寄鄭志道教諭兼簡其子宗晦

鷓鴣陂上發舟航沙石熒熒亂水光一雁遠沈天似海
三人相對月如霜風琴清瀉瓊瑤峽嵐壁深開紫翠房
拂曙分攜又春晚幾回翹首鄭公鄉

謝陳元昭憲史奉分憲舉文枉過江上

霜落江潭萬木空天回閣道五雲通山人似識郎官象

陳嘗為
錄判

憲府新陪御史驄玉斧繡衣清議在青燈黃卷

素心同還司莫話栖遲樂亦欲看花漢苑中

謝浙省諸僚友見招

百年茅舍俯梧溪梧葉陰陰水竹齊方整釣絲疎雨後
忽承書使五雲西春明左掖閒朱墨天險重關息鼓鼙
即擬一來冠蓋里相攜柑酒聽鶯啼

九日先妣遠忌日示兒掖攝拊

年年九日罷登高悽愴心存鞠養勞三宿奉齋聞磬效
一杯酹酒濕君蒿不辭亂世依龍一作親壟正用遺言訓

汝曹黃菊紫萸看易厭
碧梧風露滿庭臯

寄楊太史

青猿鐵獺伴幽尋
多在岩阿或澗陰
中歲心情高鳥上
清時鐘鼓落花深
馬徽雅有知人鑒
韋相元無遺子金
聞道別來還廢寢
北瞻太乙整朝簪

送蔡君美推官之袁州時奉使王子文為總管

奉使乘輅出薊邱
又驅五馬入袁州
石田抗稻一作秋稼

風熟仙掌芙蓉顥
氣浮蠻蜚山川通
治化呻吟兒女變

歌謳理官佐郡祥刑日應識龍光上斗牛

過丘以敬管勾吳山別業

梓潼祠畔敞林扉隱隱雞聲落翠微
銅篆解將還省署銀魚忘却掛朝衣
石厓溜雨藤根白籬落緣雲瓠子肥
想見秋風遂高隱中原野馬正狂飛

贈別趙杭州伯器時奉家君謝事還江陰

仁廟垂衣日儒門筮仕辰奎躔連五緯文運啓千春
累榜頌龍虎中原出鳳麟聲名蜚半刺議論卷重裯
劉向

讐書早東方待詔頻宮壺恩賜重郎署替來新露積三
吳粟山輸百島珍香爐辭畫省皂蓋擁朱輪宋苑花迎
節蘇堤柳映紳湖開西澱灩峯倚北嶙峋幽遠民安堵
澆漓俗返淳澹無魚入饌清有鶴隨身魏笏牀頭在崔
銘座右陳禮容加屬吏燕衍及嘉賓趙抃才何忝王戎
意獨伸雪添親舍髮桂束客厨薪菽水歸舟晚封章伏
闕晨火狐方聚嘯海鱷未全馴王業深磐石天河爛瀉
銀願言登黼袞大為展經綸

奉題濟里哈坦平章丹山隱玉峯石時寓江陰

昭代優勲舊平章謝鬪班堂開新綠野玉隱小丹山
瞻皖文崔錯孚尹氣往還崑邱玄圃畔台嶠赤城間
不假工琬琢元承帝寵頒靜容賓從仰明燭鬼神奸
秩禮均恒岱謙光俯粵蠻儼持周勃節秀擁楚巫鬟
樹錯珊瑚朶苔封翡翠斑座裊聯綺轂車轂映朱殷
或跂雙公鳳時窺一白鵬爐香嵐勃勃簷雨瀑潺潺
地縮三鼇島天長九虎關文饒淫翫好靈運癖躋攀
日月由來繞風雲

不暫閒殷曾求傳說漢亦聘商顏金匱盟藏券青春詔
賜環皇基同永固國步罷多艱館閣題千首琮璜價百
鏹願移銘盛烈褒史著人寰

送趙寬父之江西省掾

名元裕里人

翼軫珠聯璧匡廬翠入雲地班鵲驚序閭制虎貌羣鈇
鉞恩威重謀謨掌握分顯曹今已辟盛蹟比來聞靖密
參機要從容斂垢氛全彰梯入貢諸校凱旋軍漢吏卑
緣飾齊臣重解紛西垣居養異上相禮文勤芍藥春看

雨芙蓉日待曛白花雙井并香飯九江芹壯觀滕王閣
豐碑孺子墳柱標囚蜃許渚表寄書殷弔古舒心目懷
賢薦苾芬世家光汴派吾道晦河汾田薄紅栖粒齋虛
碧映芸亭衢深望友滄海謾憂君有志觀周樂無材覲
郢斤鷄居仍本性騷衷自蘭筋北斗三台列南風一氣
薰行紆虢州錦歸耀故鄉粉

人
奉陪何秘監貢司業宴吳司令士明棣華園

名惟誠里

園居賢伯仲堂宴列仙儒陸地生盤谷三山失翠壺池
文春藻淨峯影夏雲孤鶴隴威紆入鶴梁窸窣鋪竹森
淇澳士花擁洛陽姝黃鳥尊浮蟻清風膾斫鱸罌鷺懲
李監薪蠟賤齊奴潦倒粗疎隔風流醞藉俱遊絲高柳
礙醉袖小蠻扶興入香山社詩題曲水圖陽城徵起晉
賀老賜歸湖佩訝金龜重官宜白馬癯諸生遙在望故
吏暫休趨和氣塤篲叶佳時几杖娛情敦賓客禮身服
古先模衣共非文繡經明是典謨八龍驪里色三鳳頡

天衢棠棣名專美芝蘭實並敷
一邱吾獨忝四海道相
於徑造茲成癖毋煩折簡呼

奉寄趙伯器叅政王時中員外五十韻

詔立淮南省符張閫外兵風雷朝煥發牛斗夜精明叅
政材超偉元僚器老成武林多樹政禁藥舊蜚英鳳暖
文章蔚鯤秋羽翼橫天池今並奮嶰管復和鳴地要尤
膏沃時危必戰爭輔車依海岱衣帶限蠻荆玉葉開王
邸烟花匝子城萬艘鹽雪積千里稻雲平織貝殊珍粲

紅樓艷曲縈並緣胥狡黠貨殖駟驕盈汝祲初萌起河
流寢妄行鎮綏增屏翰贊畫授權衡愛稼須除騰憐牛
貴搏蝨式蛙曾霸主斬馬乃書生青汗三千牘丹心一
寸誠相臣連萬騎郡邑望雙旌甓社湖移蚌縹絲井露
鯨里無安堵樂野有望塵驚烏鹵烟侵燧孤嫠膽碎鉦
五賢迷古轍六詠歇新賡瓦礫皆王土逋逃本爾氓長
驅勞組練盡掃愧欃槍喻擬相如檄降懲白起坑跋胡
狼曷備毒尾蠆難櫻濟猛收神略疏恩渙虜情佇聞鹿

柵下莫作鬼方征回鶻
卑唐室天驕撓漢營
乾坤一羽扇社稷幾
羊羹杖杜交加影芙蓉
裏娜莖超然延爽笏
肅若衛寒更慮念真如
是功勲孰與京誓清懷
晉逖虛左慕齊嬰好定
龍蟠價毋登狗盜名石
洪重脣辟韓愈建封迎
故典何其盛斯文與有
榮中州襟陝隴上國掖
幽并麟閣將來繪雞壇
宿昔盟芻蕘言慎擇葵
藿義同傾羿閭商參恨
栖遲畎畝耕小齋餘首
蒼四境半蕪菁酒憶涓
涓縹鮐炊箇箇頽悲歌
垂短褐慷慨睠長纓親

病長憂懼身竒鮮弟兄君公終隱迹充國燁家聲楚角
關山晚吳陵草樹晴鶯知幽谷候雁識大江程報政梅
全發封詩月迴清遙應語何遜開閣少陰鏗

奉題楊同僉山居

山居今上御書

湖上仙翁嶺周南太史家烟霞分半壁日月架重華宸
翰彰殊禮山靈被寵嘉有雲皆紫氣無樹不珠葩私印
存班玉宮牌護賜牙地遙天象馬

太史院日
給天象馬

海近斗牛

槎翠鑿岩扉靜梯懸鮮磴斜金光浮藥草澗影帶胡麻

潘閭神相接林逋望弗賒
壑移憐賈蟒

世傳似道為蟒精

石在

歎秦蛇

地有秦皇纜船石

世事東西蝶人生左右蝸累官渾似

隱一飯不曾奢庶矣千頭橘優哉五色瓜
祗愁使者至林下有驚麋

贈別浙省赫赫左丞國寶自常州移鎮徽州三十

韻時歲癸巳

查係至正十三年

武德興元運文恬近百年一隅初難作四境遂兵連
斧辰朝元早彤弓授命專馮岑材並濟李郭駕爭先
路入

延陵邑星分左轄躔著名黃閣上虛位紫宮前汗血駒
千匹跼跼士兩甄帳寒龍守劍城曙虎飛旃跡掃齊門瑟
身親楚醴筵惠山屏列野震澤鏡涵天刁斗軍中堠鉏
犁亂後田白無遺朽骨青有續炊烟插羽書間署封泥
詔撫邊陣容催畫鼓蠡氣動樓船舊政猶霜肅新安素
地偏蜃精嘗感夢帝子或逢仙漆葉雲羞密茶花雪妬
妍誦絃家櫛比冠蓋里班聯鄒魯流風洽甌蠻習俗遷
比來疲賦斂况復值戈鋌餽稍官曹待謳歌父老傳挽

屯吳幼節總體漢文淵裴度歸休近羊公臥治便鼎彝
今燁赫韋布數周旋小閣牛行炙長楸鶻試拳王融五
雜俎孫武十三篇華夏殘河汴神州歸薊燕殄除纔蚘
螻睥睨滿鯨鱣狂斐言姑及高明義莫捐憂君尚有疏
倘寄麥光牋

寄題汪尚書堪老園

夫子功名遂何人位望如漢朝疏太傅唐日孔尚書山
繞玄暉閣門懸廣德車青箱家乘在白髮世情疎衆訝

逃空谷吾知厭直廬甕餘天賜酒盤盛圃栽蔬野鶴隨

鳩杖宮鶯隔燕居行春花信裏占雨樂苗

疑藥苗

初古傳

時眠讀長竿或坐漁溪毛頻自薦庭草不教除洛社今

司馬經帷昔仲舒短檠簾幙護甌石斗升儲首闡宣尼

學尋傳乙第臚渥生周駉駉崑出魯璠璣焜耀三階列

清明一氣噓史編尊宋統子訓屬倪鉏晚食師顏蠋狂

歌陋接輿俸仍官侍從閒似老村墟故吏金鑪鵲諸生

玉佩魚候安連禮餽奉教及菑畬朋舊歡彌洽君王席

遂虛乾坤方用武江海獨愁予
大手煩詩序私心式巷間
行應赴三老為國補遺餘

梧溪有懷二首

薄雲天欲晚微雨水先涼
燕子交飛處梧花滿樹香
懷人路非永對酒世相忘
不怪衣裳濕中宵延露光
虛館涼氣集方池白水生
幽花含晚艷嘉木有餘清
酒綠尊中瀉琴絲膝上橫
疎簾映微雨益起故人情

題沈氏別墅

小築回塘上春陰水暫寒柳遮蓮葉艇花礙竹皮冠生
理尋常足閒心一寸寬知予厭奔走絕口不言官

寄何憲幕

令弟來吳下從容問起居客來籠放鶴官在釜生魚江
漢心同向風塵跡自疎冀州十萬戶誰引魏文裾

簡任子良縣尹

儒雅南陵尹歸吳賦遂初畫傳韓幹馬羹煮季鷹魚柳
暗凝香閣花交織翠裾能令兩童子為我導行車

杭城陳德全架閣錄示至正十一年大小死節臣
屬其都濟爾以下凡十三人王侯以下凡九人徵詩

二首并後序

累朝承泰運四海構兵屯報國誰謀主輸忠獨遠臣蒼
梧愁思竭青竹汗痕新少賜當時姓華風接後塵

是年盜麻起二月山東副都元帥都濟爾師出鄒平
縣中流矢死五月徐州兵馬指揮使圖魯亳州陷陣
死六月廣德翼萬戶關珠舍塘洋水戰死汴梁路同

知黃頭項城縣被執不屈死時尚乘卿那海戍項城
語子布固圖姪阿剌布哈等曰彼人新執黃頭勢驕
突甚與其應敵孰若進討苟天未厭亂吾一門不忝
下尚書矣布固圖等曰大人誓許國兒輩何愛死遂戮
力戰多所斬獲卒以援絕咸死之七月廣東奏差發
里率白徒拒周塘或勸之走發曰祿位無小大見危
則致死焉亦死之安東萬戶都噶爾千戶高安圖並
中
流矢死潁州九月汝寧知府旺扎勒府判福祿護國連

抗十日城垂陷仰天呼曰臣等義不辱竟投水死西

城司副使塔海守徐州既捷

一作大捷

轉戰死東壁

一作東盤

十二月宣徽院使特穆爾河南萬戶察罕相繼鏖戰

死南陽臥龍岡下托卜戩贈遼陽左丞謚襄愍圖魯贈

河南叅政謚忠勇關住贈浙東宣慰使謚遂愍黃頭

贈兵部尚書謚忠介那海贈河南右丞謚壯勇發里

贈南海縣簿尉都噶爾贈淮東宣慰使謚忠果福祿贈

兵部尚書謚忠遂安圖贈淮東宣慰司同知謚介愍

旺扎勒贈淮東宣慰使謚壯愍塔海贈遼陽叅政謚忠
勇特穆爾贈河南平章謚桓愍察罕贈山東宣慰使
謚恪愍

王臣名在目野史淚沾襟榛棘生周道梗楠滅鄧林乾
坤英氣合河海湛恩深尚有諸新鬼瞻天嗣玉音

二月廣州推官王宗顯香山寨巡檢曾元吉戮力死
石岐六月沿海奔百戶尹宗澤戰死黃巖八月封州
吏目唐國寶俘賊中卒死不屈西臺御史張桓謝職

居確山縣被執大罵逆黨怒縛妻孥脅之降桓罵益厲囚旬日妻孥九人俱遇害九月刺場嶺義兵千戶宋如玉迎敵於西大嶺死蘄州總管李孝先分守蘄水亦死之十月雅州司吏劉處岩守南關巷戰死十二月權一作權香山巡檢張德興以不從叛亦死宗顯贈廣州總管謚良愍元吉贈香山縣尹宗澤贈松江府判官國寶贈南海縣簿尉桓贈禮部尚書謚忠潔如玉贈平樂府判官孝先贈河南叅政謚義愍處岩

贈睢陽縣尉德興贈奉元府判官

右前後二十二人嗚呼殉死者大傳偷生者不大愧耶

送譚仲張知事

儒官登幕府勝地數郴州五嶺深開壁三湘遠合流文興由孟綰城築始楊璆雪普民豐樂祗應坐嘯秋

題靜安寺雲漢昭回之閣

有引

閣本光宗皇帝在潛邸時書賜安撫使錢良臣後閣

廢子孫捨石刻置寺閣曇琛二上人徵題詩云

雲漢昭回夜新登最上頭叢林幾度臘片石百年秋
與氣隨天盡疎星帶月流身今在析木無暇顧牽牛

句容縣望三茅峯

斗邑抱重岡三茅峯頡頏地呈青玉案雲羃翠瓔房
靈籟殷天樂大丹流月光神遊猛虎外身與意都忘

衢州華豐樓望柯山江郎石

華豐樓信美登望久踟躕木落偃王廟天寒姑蔑墟
屏

開山石遠青鎖洞霞虛不有從親役乘風振珮琚

送張子恭憲史還鄉遷母葬復之婺州

張仲霜臺彥還鄉安母靈山人攜絮酒太史撰埋銘

黃先

生清佳氣雲霞色芳羞沼沚馨慈烏感孝行飛候最高亭

送鄧伯林判官還江西

黃田寒浪稀衣錦上船歸天上梅開徧山中桂合圍鄴
侯書具在孺子宅相依便好全高節東湖玩夕暉

壬辰冬十一月避亂綺山簡邱文中貢原父二教

授

雲掩金戈日風生鐵馬塵亂離誰事主貧賤獨為民難
大人烟絕鼪鼯草木鄰喜聞同舍語天已厭荆榛

至正十二

年

題內兄李四彥梁所遺溫日觀蒲萄

有序

逢與內兄遭乙未亂相失又五年始邂逅妻上勞問
間見僧溫蒲萄圖益為愴惕嘗記垂髫至十五六時
侍大母徐氏

諱閏芳

側累聞之曰吾舍西舊有蒲萄因

樹為架涼天佳月而祖

諱亮字
潛昭

偕四三友朋歌樂其

下醉乃休而祖歿蒲萄亦

一作
從而

枯殆二紀矣間又誨

曰而祖上自高曾逮而父咸獨植門戶汝僅有弟唐

寶又早喪使汝苟富而玷宗不若素貧而承祀薄田

敝廬可粗守也汝其毋忘大母壽八十六卒且二十

稔內兄久辭閭曹年已六十逢竊伏江海亦四十餘

矣觸物感心不自覺涕泗泣然也內兄以圖遺逢因

序而詩之是年至正己亥

乙未至正十五
年己亥十九年

吾家先大父嘗愛草龍珠一樹紫烟濕八窓清露濡干
戈形遠夢江海見斯圖歷歷重聞訓終身誓不渝

台州吳子中過侍郎橋客樓夜話為贈八句

主簿別來久掛名材傑間挑燈且說劍憂世未歸山石
櫃波上閣玉門天外關心期遂雄覽華頂厠仙班

仙茅塢

夜宿仙茅塢金鼇湧亂山天風來海外烟火落人間白
石思同煮青蘿喜獨攀締衣弄華月公子亦忘還

韓蘄王墓

道過韓王墓停驂淚滿巾
中興無輔相恢復有勲臣
碑冷靈岩月山還古寺春
雲仍尚詩禮時薦碧溪蘋

題賈性之市隱卷

簾戶隔塵闌幽花坐可攀
題詩江令宅採藥越王山
日覺雲林隘春餘漏水閒
龐公謝劉表何事不知還

題沈鰥齋尊師水西亭

高人沈東老亭在水西頭
光湧金波月涼分白帝秋
芙蓉

蓉連桂館翡翠立蓮舟獨許浣花客時來同釣游

題畢天池道士太霞樓

畢卓太霞樓霜清

一作晴

錦樹稠天光開日觀海色動崑

丘織女機橫夜仙人坐對秋時將白玉尺醉擁翠雲裘

常州分省席上二首

玉帳虎文茵弓旌左右陳鸞刀分鸞炙龍勺灑浮春舞
困珠璣脫歌深翠黛顰心存大臣體授簡屬嘉賓

兵戈時事改貧賤道心同泥飲悲長夜高歌憶大風龍

銜劍花白鳳繞燭蓮紅猶得斯須間賓僚語即戎

題西施洞響屨廊二首

石扇天開蔓草平斷雲殘雨古今情洞靈花

一作北

月長

幽泣不與西施受惡名

金蓮步冷草啼蜚羅襪塵空葉滿廊獨憶愛姬為隊長
一雙鸞血釁干將

乾封西山狀神秀予名曰青猊書絕句厓石上

青猊猊猊孕金精為王爪牙足扞城我豈龍蟠鳳逸士

醉來背上躡雲行

溪山第一亭望靈山兼辭聞雲菴道士

辭一作寄
菴一作菴

天高亭空霜鶴盤烏柏落子楓香乾千六百里斷鄉信
七十二峯來翠寒

靈山道者碧瞳方抱琴一童如鶴長雲根羊臥水晶
一作精璞水杪磬懸蜂蜜房

贈龍秀

一作虎

山人鄭良楚

有引

良楚修潔士也癸未春來乾封及還教諭許仲宣偕

儒先鄭叔芳韓養正徐明立黃以道等飲餞鷓鴣陂

上咸詠歌之予亦

一作姑

贅絕句二首

一本明立下有徐明吾韓積之

施國禎韓大正

四人無等字

太行黃河快壯遊歸田無復夢神州蒼龍朱鳥掛庭戶

詩罷滿林風露秋

百藥籠頭餘一琴病夫不拒愛知音石田歲稔茅屋好

種菊乞詩虞翰林

謝睢陽朱澤民為畫六和塔前放船圖

有後序

青城丹丘舊所賢
畫圖曾惹御爐烟
一官歸老天宮裏
為寫浙江秋水船

六和塔前江水流
天清無雲風始秋
夕陽半落錦萬頃
著我一箇發仙舟
行行綠水鶯花供
吳山越山作騶從
乘壺美酒鱸十頭
只少桓伊笛三弄
右歌逢丁亥歲作也
越一紀君訪逢吳門
偶見而歎詠久之翌
日逢謁君天宮坊寓
隱案間筆研楚楚然
徐示圖曰烽烟良阻
子其意遊乎逢喜而
持歸敬題絕句青城

丹丘謂虞柯二公舊推重君者君名德潤嘗受知英
宗尋遠引去

題鮮于太常食膾詩後

白鷺羣聚碧溪潄青李來禽滿院陰臨罷太常鱸膾帖
日斜無限故園心

題李陵泣別圖

節毛風動馬駢駢塞日無光漢月輝不謂家聲竟隕落
壯心曾待斬關歸

登越城故基

吳王臺對越王城
歲歲春風燕麥生
一片范家湖上月
照人心事獨分明

重裝黃荃雀哺雛
卷題梁先生序贊後

序贊附

江陰王庫使家藏黃荃雀哺雛
後有後村詩跋嘗聞
古院畫率皆有名義是三雀者殆取詩禮春秋傳三
爵之義歟荃蜀人故云浣花溪耳雖然姑置老荃而
論後村方宋氏叔末時王臞軒劉後村文章聲錚錚

相頡頏臞軒元宵詩首押科科末押民膏後村此崔
詩和韻乃竄入雛韻王以詞賦高科第二人及第劉
以名臣子孫有文辭賜及第真西山為中舍舉之自
代皆非不諳韻者直狃于閩人

一本有語
言二字

聲音不覺

跌宕當不以過余既贅論且贅贊云觀崔哺雛可以
知仁仁於曷知於崔之身崔知有子子知有母飢焉
思哺食在母口嗟彼崔矣以鞠以育矧伊人矣孰無
天屬幼資于親長養其親天屬至親最哉世人庚辰

三月三山梁益

黃荃三雀寓官規
劉筆梁文重秉彝
野淨草薰風日美
冥鴻亭上看多時

和張率性經歷竹枝詞二首

溪上鶯兒柳色黃
溪邊花樹妾身長
浮藻可是無情物

采得歸來好遺郎

無情物一
作無根蒂

道傍花發野薔薇
綠刺長條絆客衣
不及沙邊水楊柳

葉間開眼望郎歸

葉間一
作葉葉

送盧希尹之金華兼簡其兄希閔憲郎

路入蘭溪第一程滿船月色聽灘聲
雍渠飛傍青驄馬最愛君家好弟兄

丙戌二月廿六日夜夢遊異境見碧玉樓三字為賦二首

山開玉峽瀉清湍風挾微霜灑面寒
春樹兩邊條怒發一羣仙鶴從文鸞

夢上仙家碧玉樓靚桃纖柳帶春洲
天風微動簾齊捲

銀漢中間壁月流

馬大沙獨遊


沙路泥乾信馬蹄
水村風靜迴聞雞
春光搖蕩無人見
滿眼蒼烟竹樹齊

題墨芙蓉

太華峯開玉井
未央殿立金莖
誰甘六郎風度
不愛君子令名

馬大沙陳氏席上走筆贈鎮南王府史府尉四首

驂騑白玉珂蒲萄紫金碗半醉臥花間宮袍月華滿
吹笳風動水走馬雷盈谷笑拈金僕姑射殺一白鹿
鼓行沙漠風鞍臥關山月老矣歸去來心神夜飛越
貂襜狐白裘蒼鷹錦臂韝據鞍笑上馬馳入長林樾



梧溪集卷一